



Mairuonių Švč. Mergelės Marijos bažnyčia

# MAIRUONĖ

ŽELVĪTĖ DANGUOLĖ

Pakeliu iš Pagrižuvė į Kelmė – Mairuonių gyvenvietė. Ana priklausa Lioliū seniūnijė. Pru šali tek Dubisa, katruos slienė čė, kãp ė kėtuos Žemaitėjės vėituos, sotrauk daug gamtuos milietuoju, turistu. Par Mairuonius tek Saldaus upielis, katros seniau toriejė Saldas varda. Pagal anou gyvenvietė iki 1933 metu Saudininkãš ėr bova vadėnama, vuo Mairuonių vardo pavadinta poeta, konėga Mačiulė Juona-Mairuonė (1862–1932) garbė.

Rašitėniūs šaltėniūs XVIII omžiou pradedams mėnietė Saudininku dvars, katrou 1927 m. išparceliava. Miestelie stuov 1782 metãš pastatita Švč. Mergelės Marijės bažnyčė.

Mairuoniūs 1920 m. dvarinink Marcinkus pasėrūpėna, kad kaimė būtom atėdarita privati vėina komplekta pradiuos muokikla. 1931 m. anã bova pastatits noms. 1949 m. kaimė isteigta septimmetė muokika, katra 1961 m. reorganizouta i aštonmetė. Dabar gyvenvietie veik pagrindėnė muokikla.

Mairuonė garsė kaimė esontės 1863 metu sokėlieliu kapãš. Dabar Mairuonė – tuo patėis pavadėnėma seniūnjės cėntros.

## Mairuonių koplītėlė

ČIŽIŪNS BENJAMINS  
PORTĖGRAPĖJĖS AUTUORIAUS

Kels Tituvienã–Kelmė šiuos vėituos nepraėlgst. Apilinkės gražės. Aple do kėluometrã nu Mairuonių, kairiuojie Dubisãs slienė posie aki patrauk Mairuonių koplītėlė. Anuos istuorėjė – išskėrtėnė. Koplītėlės vėdou – akmou. Žmuonės tėk, kad anamė ėr ispausta vãka pieda, lazda ėr kielis. Vietėnė pasakuo tuokė istuorėjė: daugiau kap priš 160 metu tuos apilinkies gėvena ūkinink Žilinskis. Uns rada tou akmėni ėr tuo vėituo, kor anou pamatė, sorėntė maža, 1,5 m aukštė koplītėlė, i katrou pastatė Švč. Mergelės Marijės skulptūrėlė, vo šalėp koplītėlės – ėr krīžio. Tou krīžio vīrs pastatės pu tuo, ka anou aplonkė tuoks regiejėms: bŭk tã Žilinskiou pasėruodiusi Švč. Mergelė Marijė ėr lėipusi tuo vėituo pastatitė koplītėlė. Žilinskis vėsa sava lėkusi gėvenėma rūpėnuos tou koplītėlė ėr šalėp anuos bovusiu žmuoniū vadėnamo švėnto šaltėnio. Ka Žilinskis mērė, senuosės koplītėlės vėituo Tituvienu valsčiaus Pavėngrė kaima gėvėntuojė Jautakė rūpesnio bova pastatita nauji, geruokã jau dėdlesnė koplītėlė, katrou tėlpa ne mažiau kap ketorė žmuonis. Uns sėrga, bova paralīzouts. Negaliosu pripauts vīrs apsėžadiejė, ka, je išgis, pastatis naujė, dėdlesnė koplītėlė. Išgėjė ėr koplītėlė pastatė. Anou pašvėntėna konėgs P. Vaškevičė. Kap ėr onkstiau tuo kuoplītėlie bova sauguoms jau mėnavuots akmou ėr Švč. Mergelės Marijės skulptūrėlė. Tuoliau bova priveizams ėr šalėp koplītėlės esous šaltėnis, katrou vondou, kãp pasakuo senėjė tuo krašta žmuonis, ėr daug kou pagidės.

XX omžiaus pradiuo ta vėita bova dėdlė garsi. Pasėmelstė, Švč. Mergelės Marijės maluonių paprašitė žmuonis liuob soplauptė iš tuolėmiausiu vėituo, vuo atvažiavė liuob kelės eitė aple koplītėlė ėr melstėis. Tou laiko Saudininku dvara ėr anuo apilinkiu šėimininkė bova Chruščiuovienė Uona. Ana ūkiou ėr dvara mėškams tvarkitė somdė urieda. Maldininkã anam nepatėka. Vėina karta jiemė ons ėr vėsus maldininkus išgainiuojė. Už tuoki darba greitã bova nubausts – bėpareinonti nomėi anou tou dėina paralīzava – sotraukė i kamūli. Ėlgã gidies, bet nikuokėi daktarã nepadiejė. Tumet pats paprašė, kad anou nuvežto pri tuos Mairuonių koplītėlės. Iš vėsū silu šliaužuojė, šliaužuojė aple koplītėlė, ėr pasveika. Dvarininkė Chruščiuovienė Uona bovusi dėdlė kontėna sava urieda darbo, tad, ka sožėnuojė juk uns išvažiava pri koplītėlės, pasėžadiejė, ka, je urieds pasvėks, vėituo senuosės pastatits dã dėdlesnė ėr mūrėnė koplīčė. Ka urieds pasveika, ana davė gerū rauduonū plītu, paskirė mūrėninkus, dar kelis kėtus vīrus ėr pastatė dėdėlė koplīčė, katra panaši i bažnyčė. Stuov ana ėr šėndėin. Aplinkou koplīčėlė – krīžė, katrus žmuonis pastatė atsėdikavudamė Švč. Mergelė Marijė už pagėjėma. Šaltėnielis



Mairuonių akmuo

Če tēp pat tebrīkšt, pasēsēmtē vondēns sostuo nemažā žmuoniū.

Dabar koplītēlē – pri pat plēnta Tituvienā–Kelmē, katros bova notēists sovietmetio. Planoujint darbus bova siūluoma koplītēlē vēsā noverstē, vuo kieli notēistē anuos vēituo. Valdiuos žmuonis žēnuojē tuos koplītēlēs istuorējē, tad tuokem žingsniou nesērīža ēr koplītēlē lēka stuovietē sava onkstesnie vēituo. Kelē pīlēms dabar īr pri

patiuos koplītēlēs. Tad, važioudams kelio, je nežēnuosi, kor koplītēlē stuov, gali anuos ēr nepamatītē.

Dabartēnie koplītēlie īr irēngts altuorios, anamē stuov Švēnčiausēs Mergelēs Marijēs skulptūra (ta skulptūrēlē koplītēlie jau īr pēnktooji – anou paduovēnuojē vienuolis Mickevīčē), vo šalēp altuoriaus – tas garsiesis akmuo so vāka piedo. Čē īr bovē dar ēr do švēntē paveikslā – Švēnčiausēs Jezaus Šērdēis ēr Švēnčiausēs Mergelēs Marijēs Šērdēis. Bet... Neaplēnkē ēr tuos koplītēlēs vāgis. Šeimininkava anēi čē ne vēina karta. Išnešē ne tik tus paveikslus, bet nemažā ēr kētū vertībiu, katruos tuo koplītēlie bova.

Šaltēnielis i žēmēs paveršio veržas už 50 metru nu kopītēlēs. Ons patenk i specelē tam padarīta šolēnē, vo vondēns perteklios nobieg i Dubisas opē.

Koplītēlē ēr anuos aplinka gražē sotvarkīta. Tou pasērūpēna Mairuonių parapējēs klēbuons konēgs Švabīnsks Kēstutis. Dēdlies pagelbas ons solaukē iš Liuoliū seniūnējēs seniūna V. Mikalauskē, girininka A. Kaubrē, eigolē V. Stunē, apīlinkēs ūkininku, kētū parapējēs gīventuoju. Sotvarkē, nodažē, takieli pri švēnta šaltēnē naujē irēngē, kvietku padēigē, tvuoro aptvierē.

Šēlto metu laiko, pradedont pavasario, kuožna mienēsē 13 dēina 14 valonda Mairuonių parapējēs klēbuons Mairuonių koplītēlie aukuo Švēntas Mēšēs. Čē tonkē gali sotēktē besēmeldontius žmuonis, atvikusius ne tik iš aplinkiniu kaimū, bet ēr iš Vilniaus, Kauna, Raseiniu, kētū vēituo.



Mairuonių koplītēlē 2010 m. pavasari